

VISP 23. + 24. FEBRUAR 2019

SAMSTAG

Schminkä, 09:45 Uhr, es cha los go, üsses Wucheände z Visp. Nachdäm mir aui grünen gmacht hei, hei sich 4ri gopferet mitem Outo uf Visp z dislozierä. "Danke Däster, und danke Römu!"

Aui angere hei s Vergnüege gha mitem Zug gäge Visp zue z fahrä. (Was isch äch am Zug fahre es Vergnüege....) Looslis und Ulmanns si z Huttu am Bahnhof ou zu üs gtosse. ☺

Womer du z Visp si acho, simer is St. Jodern go üsi Zimmer bezieh, hei när d Instrumänt gfasst und si richtig Napi is Apéro gstoche. Dr Michu uns dr Steve hei no e spontane Abstächer zum Coiffeur gmacht. ☺

Nachem Aperölä, heimer vorem Napi no es Ständli zum Beschtä gäh und si vorem Ässe no e Abstächer id Bahnhofungerfüerig go mache. Dert dönts gäng so schöööön... ☺

Im Rest. Terrasse heimer füre kommend Obä guet ungerleit und es feins Znacht gnosse.

Nöchschte Programmpunkt, dr Obeumzug. Leider hets wider div. Ching gha mit dene blöde Schuumsprays wo nie meh vom Kostüm use bringsch! Was ou no erwähnenswert isch, so viu Konfetti wie z Visp hani süsch no säute gseh. Dr Umzug isch immer öppis speziells, da är haut am Obe isch.

Mir hei a däm Obä no 2 Uftritte gha, wo us mire Sicht super si gsi. Üse Tambi het fürnes abwächsligsriichs Programm gsorget. Mir hei äüä kes Lied 2x gspiut a däm Obä.

Jo när si es paari richtig Bett und die angere si no chli uf Gass. ☺

SONNTAG

Schminke am nöchschte Morge... Döu hei besser und döu weniger guet usgseh. ☺ Instrumänt fasse und richtig Choufplatz abeloufä, go warte bis d Fleigä ihres Konzärtli spile. D CH-Gugger hei ou no ihri Lieder zum beschtä gäh, bi prachtvouem Wätter isch das es schöns erwache gsi.

Jo und när si du mir no dranne gsi. ☺ Mir hätte auso 4x uf dr Bühni platz gha...

Nach de Konzärt ufem Choufplatz simer du langsam wider gäge Umzugsstart abe glüfe. Zäges dr glich Umzug wie am Vorobä aber haut bi Tag. Wider vüu Konfetti und äbe o wider dä doof Schuumspray aber weniger aus gschter, e wahri Freud!

Nachem Umzug heimer no ei Uftritt gah uf dr Bühni Mixed und so isch üses Wucheändi in Visp wider verbi gsi. Mir si go d Instrumänt verlade und de ufe Zug.

Ussert äbe die mitem Outo, wo am heifahre leider no im Stou gstange si. Mir hei du z Huttu am Bahnhof no chli müesse warte bis s Outo mit üsem Gepäck isch itroffe aber das isch nid so schlimm gsi. Danke no fürs usladä vo de Instrumänt dir Liebe!

Churzfassig: Das Wetter war gut, wir hatten Spass, Es war schön!

I däm Sinn, mir hei gschlossä. ☺

Pädu & Ste